



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

ВАКАЦИИ.

Скончила ся наука в школах. Зачал ся чудный час для учачой ся молодежи — вакаций. По цілорочных трудах в містовых школах вертают до сел розрадованы школяриky-ученники гимназий и иных школ. Многы с них покончили уж в том році гимназии и перед нима стає ро рішення тяжка справа, што робити дальше, до якого лица записати ся и яку дорогу выбрати на ціле жите.

Не ест то легка справа, бо каждый отец, посылаючи сына до школы, хотіл бы обезпечити ему кусок хліба, хотіл бы, штобы тот сын як найскорше почал сам зарабатывать на себе и перестал быти тягаром родины, а ту уряды запханы, ніт вольных посад и о службу чи то рядову, чи приватну, ест барз трудно. Приспособляти днеска дітину до уряду, то значит Perezначити ю на то, же она по окончению школы буде сидити долги літа дома. Через тот час дітина, видячи, же ей наука не приносит ей користи, тратит віру в людей и в свои силы, стає ся сквашена и знеохочена до жита и часто наберат злых навыков, котры деправуют чисту молодячу душу.

Прото тыж, по окончению гимназии, належит выбрати такы школы, котры дают найбільше видов, же по их окончению дітина або достане посаду, або потрафит сама на себе заробити. Такых школ ест дост дуже, лем не всі знають о том и не всі интересуют ся нима. У нас, особенно на селі, отец, отдаючи сына до школы, думал передовсем о том, штобы сын его выучил ся на священника. Прекрасне зване, але всі не могут быти священниками, бо бы бракло для них парохий. Не могут также днеска раховати на то, же сыны их будут судиями, урядниками и учителями, бо тепер до уряду ест ся барз трудно достати и не всі там принимают. Прото тыж, не можна тепер посылати дітей до таких школ, до яких привыкли мы их посылати в передвоенных часах, а мусиме глядати таких, котры в теперешных условиях дадут нам возможность увеличати ряды сельской трудовой интеллигенции. До таких школ належат в першой мірі школы рольничих низши и высши. Школы сельского хозяйства низшого тына сут Perezначены для тех, котры скончили народну (повшехну) школу, але сут также рольничих школы тыпа лицейского (по окончених 4-ох

клясах гимназияльных) и школы университетскы, по окончению котрых достает ся тытул инженера-агронома. Школы сельского хозяйства всіх тыпов сут для нашего экономического жита на селах барз важны, бо чим больше фаховых людей буде на грунті, тым вышши будут доходы с грунту и тым богатиши станут ся наши села. До рольничих школ повинни ходити передовсем тоты діти, котры по родинах достанут грунт. Школы тоты научат их лучшей управы грунту и вытягнени с него высших доходов. Скористат с того не лем тот, котрый скончил школу сельского хозяйства, але также его сусіды и ціле село, котры, видячи, як он веде свое хозяйство, начнут его наслідовати и таким способом поднесе ся экономический уровень цілого села.

Як уж нераз мы писали, грунту в наших горах ніт ище за мало, ест его досыть, штобы выкормити аж и два раз тилько людей, килько ест тепер, лем треба змінити способ господарки и допасовати ю до теперешных вымог. Трудно в малой газеті подати способы господарки, бо они будут праві в каждом селі инши, то то може зробити лем фахово образованный человек, каждый в своем селі. Иначе

Што зробити с жидами в Польщі.

„Газета Польска“ помістила ряд артыкулов, в котрых старат ся розвязати справу жидовску в Польщі. Як відомо, в Польщі жие много жидов, котры опановали цілковито торговлю, а по части также и промысл в Польщі. По містах и по селах праві всі skleпы находит ся в руках жидовских. Также в их руках находит ся много фабрык. Тото опановане через жидов торговлі и промыслу, вытворює тяжке положене для христианского населения Польщі, котре ест под тым взглядом меньше подготовлене и выроблене и не може успешно конкуровати с жидами. Прото тыж чим раз частійше выдвигат ся мысль, штобы для жидов вынайти новы терены для их переселения. „Газета Польска“ пише, же всі сут того мніня, же одыноком рациональном розвязком справы жидовской ест эмиграция жидов до чужих краев, але переведене эмиграционного пляну вымагат всесторонного и

мусит ся газдовати в Крыниці, где сут купелі и где ест збыт на свіже молоко и на всі ярины, а иначе в якомси забитом дощками селі, отдаленом от міста о десятки кильометров. И ту и там добре кормлены коровы дадут користь, але организация хозяйства мусит быти инша, бо коли в Крыниці каждая жена продаст за добры гроши свіже молоко, то в селах отдаленых от міст треба основати молочарский кооператив, котрый бы занял ся переділком молока на масло и сыр и тоты продукты высылал в світ. Тоты всі рижны условия, в яких находит ся сельскы хозяйства рижных сел, потрафят уловити скоро лем фахово до сельского хозяйства приготовлены люде, отже такы люде, котры скончили школы рольничих. Они сориентуют ся скоро в потребах своего родного села, до тех потреб допасуют господарку и поднесут культурный и экономический уровень сел.

Прото тыж, як найбільше наших молодых школяриков най иде до рольничих школ. Най они не стыдають ся плуга и мотыкы, бо плуг, борона и мотыка, находит ся в разумных руках, сут певным фундаментом силы и могучости народов и держав.

О других школах, надающих ся для нашей молодежи, напишу в слідующом числі.

напруженого усилия цілой общественности. Покаль до того не дойде, пише дальше автор в „Газеті Польской“, ест лем одно успешное средство, а именно, не куповати нич у жидов, ани нич жидам не продавати. Ест то средство, дозволене правом, бо никто не може примусити другого, штобы куповал не там, где ся ему подобат. Жиды оголосили и переводят бойкот товаров німецких и никто не бере им того за зле. А если кто с краевых або заграничных гуманитаристов буде росписовати ся о жидовской нужді, то легко ему дати отвіт, же близна сорочка тіла, як сердак, бо Польша мусит старати ся передовсем а того, штобы облегчити положене христиан, в першой мірі, хлопов.

„Газета Польска“ осуждат всіх тех, котры погромами хотят розвязати справу жидовску.

Пренумерата в краю:

30 грошей місячно,
80 „ „ квартално,
1.50 „ „ полрочно,
3 зл. рочно.

В Америкі: 1 дол. рочно.

В Чехословакии:

2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ стороны 60 зл., $\frac{1}{4}$ стороны 35 зл.,
 $\frac{1}{8}$ стор. 20 зл., $\frac{1}{16}$ стор. 10 зл.;
оголошения малы за 1 мм. 20 гр.,
в тексті 30 гр., перед текстом
40 гр. При місячном и долшом
оголошені значна знижка.

Контото чекове Нр. 404.155.

Німеччина не хоче війни.

Німецький міністер Гесс выголосил в Штетині велику бесіду, котрой выслухало перешло 1/2 милиона німцов с Прус. Міністер заявив в своей річі, же вопреки неправдивому взгляду, Адольф Гитлер, а с ним и ціла Німеччина не хоче війни и до ней не стремит. Вожд Німеччини памятає добре, што то єст война и прото веде он политику мира, уважаючи, же война в Европі явит ся концом цивилизации. Німеччина хоче, штобы отвітственны политики также зрозуміли, што война може принести для судьбы Европы.

Переходячи до справи с Чехословакиом, міністер заявил, што Чехословакия не може власныма силами удержати мир и порядок в границах своей державы и прото являт ся она грозна для мира Европы. Тепер без всяких поводов мобилизує войско и вводит воєнне положене под предлогом, якобы німецькы войска посувають ся ку границі чехословацкой.

Под конец бесіды сказал міністер, што любов мира через німецькый народ не належит поясняти собі слабостью.

Англия и Франция недовольны с Праги.

„Фелькишер Beobachter“ подає с Праги, же делегована через Англию делегация, яка приїде до Чехословакии, штобы на місци розслідити справу судетских німцов, має широкы полномочия. Тым самым Англия принимат моральну отвітственность за то, што ся там стане.

Англицкый посол Ньютон был у премера Годжи и звернул его увагу на то, што невыполнене до того часу приречень, які дала

Чехословакия Англии и Франции, выкликало в Англии зле вражене. Англия и Франция отстают одинаково в справах непорозумлень німецько-чеського и французске правительства выразило также свое недовольне с достигшего розультата переговоров Праги с судетскыма німцами.

Отвітательны круги Праги мають быти сильно тревожены дыпломатичным выступлением Англии и Франции.

Результат „чистки“ в Совітах.

„Чистка“ в Совітах обняла такы застрашаючи розміры, што бракує там уж людей на начальны становиска. Особенно ярко видит ся то в Красной Армии, где маса войсковых отділов єст без комендантов. Штобы заповнити тоты становиска, назначают ся комендантами людей молодых, не маючих ни знання ни практыки и занимаючих до того часу низши становиска.

Тисячи офицеров и войсковых техников гдето пропали без сліда. Або арештованы и розстріляны, або утекли. Маршал Ворошилов, хочачи спасати положене, зарядил прискорити термин выпуска 10.000 курсантов, котры ходят до войсковых школ рижных специальностей и тыма недоученыма людьми пополнити ряды офицеров.

Домашна война в Испании.

Помимо побід на рижных фронтах армии ген. Франко над червеныма войсками, не заносит ся ище в Испании на скорый конец войны.

По занятю Кастельона войска ген. Франко намірают заняти 120 кильометров побережа Середземного моря в центральной Испании.

Италиянскы газеты подают, же в последних побідоносных боях принимали участь италиянскы легионеры с дивизии „Чорных Стріл“, а по стороні республиканского войска видна єст помоч Франции, котра не ограничат ся до военных материялов, але Франция послала там также своих офицеров. Италиянскы газеты опубликовали масу назвиск французских офицеров, які бют ся по стороні республиканских войск.

Республиканске правительство постановило змобилизовати ище два дальши рочники, котры отбывали службу в 1923 и 1924 роках. Тота нова мобилизация поднесе число кадров до 19.

Так переведена мобилизация, як и помоч

со стороны Италии и Франции воюющим сторонам кажут предполагати, што война в Испании не скончит ся скоро.

Англия вооружат ся.

В Англии розписано нову внутренну позичку в высоті 80 милионов фунтов штерлингов (перешло 2 милиарды злотых) на довооружене армии. Єст то уж друга позичка на цілі обороны державы. Перша того рода позичка в высоті 100 милионов фунтов была зятягнена в квітні 1937. р. Загальна сума англицких позичок на цілі обороны краю выносит тепер 209 милионов фунтов.

Войсковы круги в Англии вірят, же позичка тота выстарчит на доповнене военных материялов на 1 рок. Позичка тота была покрыта в пару днях.

Англия закупила в Америці 400 аеропланов, а в Англии фабрыкы робят 800 аеропланов. Найцікавше однак єст того, же німецькы фабрыкы зголосили ся до Англии, же могут зробити для ней аеропланы найновіших тыпов в барз коротком часі.

Пол милиона турков верне с Балканов до Турции.

В цареградї веде турецке правительство переговоры с послами Румунии, Югославии и Гроции в справі постепенного переселения до Турции турецкого населения, жиющего в балканских краях.

Передовсем расходит ся о то, штобы могли вернути до родного краю туркы, жиючи в Румунии (Добруджа) и в Югославии. Число переселенцов с тых краев вынесе около 500 тысяч людей.

Переговоры дотычат справы продажи маетков эмигрантов, штобы они при том не втратили. Существует проект, же гроши, вырученны от переселенцов заберут относительно правительства.

В Редакции „Лемка“ в Крыниці можна достати ріжны книжочки религиозного содержания.

Др. ЯРОСЛАВ СЬОКАЛО

адвокат в Горлицах.

„Голос розваги“ чи голос логи и клеветы.

(продолжене).

Когда львовский „штаб“ припомнул собі о нас.

Ище не успіли мы отрясти ся из всіх кооперативных благодатей, сосланных нам через львовскы „штабы“, а вже припомнули они собі о нас, бо надышли выборы в державный сейм.

Штобы потішити нас, упадающих под тягаром долгов, прислали нам готового вже кандидата на посла, поручаючи нам, што не смієме нич розмышляти, або противити ся, лем мусиме повиновати ся и солидарно на него голосовати.

Мы однак, созвавши сїзд делегатов со всіх сел нашего повіта, рішили одноголосно не оглядати ся веце на львовску команду, лем ити за своим розумом.

Двадцет тысяч злотых.

Забава в „рекордове поширене кооперации“ на Лемковщині коштowała нас корпоративно, то значит из общественных фондов около двадцет тысяч злотых.

Мусіли мы покрывати то, что частично фондами зликвидованой передвоенной касы а частично фондами из Амерыки, котры могли быти ужиты на бурсу.

Кроме сего мене лично коштowała тота забава парусот злотых, а всі инши, котры тоже в ней участвовали, доложили по килькадесят злотых.

И сміло можна сказати, што еслибы не тот „рекордовый розмах“ кооперации, то мы напевно замість ликвидовати, былибы отновили передвоенну „Лемковску Касу“, або средствами узисканными из ликвидации давной касы основали нову касу и мали сегодня добру и позиточну финансову инстиутуцию, так як маме одну из наибольших бурс.

Але штоже. Одна каса давала бы нагоду лем до одной ровизии рочно, а двадцет банкротующих кооперативов давало оказию хоц до двадцете ревизий, а може и веце.

На том не конец.

Не лем тут у нас дома находила нас біда с „кооперативным розмахом“ але приходили наши люде на страту и при инших оказиях.

Кооператив в Климковці мусіл платити доплату (двократне ручательство) за уділ в львовской „Защиті Землі“ мимо сего, што сам ледво жие, а селяне из Кунковой дотепер платят векселевы долги в фирмі Каррах и тов. за львовский „Дністросян“.

А люде о всем том знают

и такы річи памятают, бо селяне сходят ся на ярмарках, кермешах и при других оказиях и оповідают собі о том, што их болит.

И если смерековьяне захотіли освободити ся от зависимости и задумали сами быти отвітательныма за свои добры и злы діла, то не можна им дывовати ся.

Если я на грошевы (финансовы) подприемства селян не смотрю так як львовскы ревизоры и разного рода „Яничкы“, то для того, што я ся насмотрил через пару літ на тоту деморализацию и на падане духа, яке иде в парі с такого рода кооперативным крахом, який мы пережили, для того, што я сам пережил не одну грызоту с тым звязану, для того, што я сам не раз и не два мусіл світити очима перед своими и чужими людьми за глупоту, брак досвідю, брак совісти и нерозвагы тых, котры стояли на верхах нашего кооперативного руху. (продолжене слідує).

Роботи в червні в яринних загородах.

В яринних загородах треба найбарже уважати на нищене буряну и рижных трав, заростающих зеленину. Треба тыж грядки часто полоти и перекопывати землю мотыками и то не лем меже рядами, где росне зеленина, але также при плотах, на межах, стежках бороздах и т. д., штобы бурян, осетя и инши шкودливы рослины не розросли ся и не потрафили выдати насія.

Выполотый бурян складати на купу, пересыпати глином и поливати в разі посухы водом и гнояницом, а повстане с него незвычайно цінный навоз, званный компостом.

Физолу и горох треба в том місяци потычити, а вчасны калыфиоры, капусту и бандуркы огорнути землом.

Штобы мати на позднійше салату, редьковку, шпинат, физолу, горох и калырепу, треба тоты ярины тепер засіяти.

Помидоры, огуркы и калыфиоры перед завязанем овощей сильно навозити плынныма навозами (роспущеныма в воді), бо втотчас завязуе ся их больше и вырастают великы.

Што робити, штобы мати вчасны и великы помидоры.

Помидоры, котры перед войном знаны были лем тым, котры вернули с Амерыкы, стають тепер здоровым присмаком містового и сельского населения. Тепер встрічат ся часто

помидоры уж и в сельских загородах, серед другой зеленины.

В горах дозрівають они нераз поздно и то аж на печах, або выглядах, выставлены через шибы на ділане сонца. Втотчас тратят они на смаку и кормовой вартости. Найсмачнійши и найздоровши сут помидоры втотчас, як дозріють они на кряках на грядці. Можна тото осягнути лем через належите знавожене землі, в котру садиме помидоры. Практыка выказала, же помидоры не потребуют доброго грунту о старой культурі. Они вырастают скоро и красны также на звычайных дерньовых грунтах, лем бодай мали добре погноене. До погноеня не выстарчат однак стаенный навоз, але кромі того мусит ся им дати навозы штучны, котры належит мішати в такой пропорции: на 1 часть амонового сірчану (21%), дае ся 1 часть 40% соли потасовой и 2 части 18% суперфосфату. Помидоры подкріплены таким навозом вырастают барз красны и дозрівають о яки 2 тыждні скорше.

Велике значене має также час, коли садиме розсаду на грядку. Недобре ест розсаджати помидоры занадто вчас на яр, а также зле ест робити тото поздно. Найлучше роснут и розвивають ся помидоры, засаженны на грядку по дні 15-того мая. Если май ест зимный, можна тото зробити пару дней позднійше.

гой худобы добре ест держати их в темных, неосвіченых стайнях. Звірята тоты тратят силы и здорове, але зыскупают на вазі, а о тото ходит каждому при опасаню худобы.

Не можна однак держати в темноті звірят, уживаных до работы, а также коров и молодников. Звірята, уживаны до работы тратят без сонца силу, стають ся ліны и спячи, коровы тратят молоко и ест оно планьше, а телята и инший молодник не розвиват ся добре и стае ся податливый на рижны хвороты. Прото тыж, кто хоче мати здорову и сильну худобу, мусит дбати о тото, штобы худоба мала як найбільше сонца. Сонце в стайнях повинно падати с горы або с боку, але так, штобы не разило худобы в очи.

Лем штуку, перезначены на опас можна держати в темных стайнях.

Світло сонечне при хові худобы.

Сонце ест найліпшим лікарем. Килько то недомогающих людей жеде на сонце, штобы поправити свое здоровье, килько стариков молит ся, штобы пережити зиму, бо в літі якости легче дыхати и силы сами вертают до ослабленных мускулов.

Практыка выказала, же кров звірят, котры долгий час живут в подземных копальнях, без сонечного світла, стае ся бліда и водниста и што звірята тоты слабнут. Досвіды, роблены на кроликах выказали, же кролики, держаны в темноті, стають ся тяжши от кроликов, живущих в ясных сонечных клітках. Прото тыж при опасаню свиней, волов и дру-

Мушений выкуп арендованных грунтов.

Ведля нового права, оголошеного в Дневнику Законов Ч. 26, всім тым, котры арендовали поле о пространстві до 5 гектаров от дня 28. серпня 1924 р. прислугуе право мушеного выкупу арендованой землі от властителей по цінах специальных, а в выключных случаях аж и на долги сплаты. С права того дробный арендатор може користати лем втотчас, если властитель має понад 45 гектаров орного грунту.

Як поясняют организации малого рольництва, арендатор може або добровольно угодити ся с властителем и зробити с ним контракт купна - продажи (котрый мусит быти затверджений через Земского Комисара), або, если властитель не хотіл бы грунту продати, можна примусити его до того.

В том случае треба внести просьбу до Старосты, котрый выдаст ухвалу, присуждаючи арендаторови тытул власности арендованого поля и усталаючи ціну поля.

Термин вношеня просьб о того рода мушений выкуп поля минат дня 1. жолтня т. р.

Если бы ся оказало, же арендаторы платили высшу аренду, як належит ся на основі нормы с права „о охороні дробных арендаторов“ (аренда не може быти высша от вартости 150 кг. жита от 1. гектара грунту I-ой клясы, а в клясах низших аренда падат о 1/10 часть при каждой клясі) то тоты надвыжкы аренды мають быти потручены с ціны купна-продажи за грунт.

Будеме їсти хліб и булкы с пшенжита.

В Польщі ест земля переважно житна. На 18миллионов гектаров орной землі ест ледво одне миллион 742 тысяч гектаров землі засіяной пшеницом. Прото тыж люде в Польщі идят мало пшеничного хліба.

Держава не може допустити до того, штобы спроваджати пшеницу с чужих краев, а землі пшеничной в Польщі не прибуде. Прото тыж учены думают над тым, штобы выпродуковати таке зерно, котре мало бы смак и всі свойства пшеницы и котре родило бы ся на землях житных. Таки свойства має именно зерно, котре повстало с перекащення жита с пшеницом и котре названо пшенжитом. Може оно роснути на землях житных (середно добрых) и дае дуже соломы. Зерно має смак пшеницы и надае ся на всі легкы печива.

Першим, кто выпродуковал тото зерно, был Лукасевич, котрый пшенжито задемонстровав на выставці в Парыжі в р. 1926. По нем распочали новы пробы выпродукования пшенжита в Німеччині, Франции и Америкі, всяди с добрым результатом.

В Польщі от долгих літ трудит ся над одержанем пшенжита др. Ружанский. Осягнены через него результаты, показаны на торзі насія в Варшаві сут незвычайно цікавы. Пшенжито має солому жита и колос пшеницы. Того року пшенжито выдержало зиму добре. Проф. др. Ружанский вірит, же за пару літ покаже ся пшенжито на рынках и же люде будут его сіяти вмісто жита.

Килько выдають на себе люде на селі.

Як живут люде на селі? На тото пытане дае нам отвіт Державный Иститут Науковий Сельского Господарства в Пулавах (Паньствоовы Институт Науковы Господарства Вейского) в своей публикации, описуючой маетковое положене селян.

Обчислення того Института выказуют, же на господарствах о пространстві 2—10 гектаров ест незвычайно трудно провадити господарку и же жите тых людей ест над выраз нужденне.

Гроши, яки выдають тоты селяне на себе сут так ничтожны, же ніг о них што говорити. Подаме отже цыфры сум, яки выдають селяне богатши, господарючи на господарствах от 10—18 гектаров. Сут то таки господарства, о котрых всі думают, же сут они достаточно великы, штобы удержати родину.

Оказуе ся, же выдаткы такой родины выносили в р. 1935/36 538 зл. 30 гр. За тоты гроши родина зложена с 5—6 людей мусіла їсти, одіти ся и заспокоити всі свои потреби.

Если тоту суму розділити на поодыноки позиции, то на одного человека припадат на

цілий рок на ідло 40 зл. 4 гр., с того на мясо 4 зл., на омасту 5 зл. 22 гр., на печиво 93 гр. и на цукор 5 зл. 31 гр. При таких ничтожных сумах не счудуе никого, же хлопа не стати на соль до бандурок и же варят на селі бандуркы пару раз в одной, раз посоленной воді.

Діти сельскы сут в зимі планно одіты и мерзнут. До школы приходят што другый, або што третій день, бо як одно иде до школы, то друге мусит остати дома, бо не має што вдіти не себе.

Люде по містах думают, же діти на селі сут здоровы. Тымчасом баданя лікарскы ствердили, же на селі встрічат ся барз дуже дітей хворовитых и слабых. В місті діти могут ити до лікара, а на селі лікара ніт, а до міста далеко и прото никто не знае, килько дітей хворіе.

Не дуже выдае ся и на образоване дітей, бо як же выдати дуже, если всі выдаткы на одного человека выносят рочно 100 злотых, што робит денно 27 грошей.

Цыфра тота бесідует сама за себе.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО”.

Што чути в світі і в краю

Голод грозит землі келецької. В келецькій землі знищил град уж два раз в том році так сильно засіви, же на пространстві 8000 гектаров ніт праві ніч. Град, величини курячого яйця перешол над тума теренами два раз. Терен представлят страшный вид знищення. Засівы прибиты до землі, дерева обдерты с листья. На полях лежат сотні курапатв, а по селах град выбил масу домашних птахів (кур, гусей, качок), котры на час не потрафили скрыти ся перед бурьом.

Ведля провизорычного обчислення втраты выносят понад миллион злотых.

Гром забил хлопа. Также над Краковом и окрестностью перешла в том році пару раз велика буря. В Кракові не вырядили бурі великих втрат, але по селах от перуна згоріло пару господарств. В Чхові ударил гром в хату Якуба Бохенского, облетіл цілу хату, сорвал со стіны годинку и ударил в Бохенского, убиваючи его на місци.

Искра с пароходу сприпинила пожар. В неділю, дня 11. червня (в перший день Русаль) о год. 4. по полудни повстал пожар в хаті Сусідка в Поворознику, пов. новосандецкого. Хата тота стояла при желізнодорожном торі. На пол години перед выбухом пожару переіхал коло хаты поїзд, ідучий с Кракова до Крыницы и подозревают, же искра с паровоза споводовала огонь. Пожар обнял в коротком часі будынки мешкальны и господарскы так, же коли приіхали пожарны сторожы с Крыницы, не было уж што ратовати.

Сильне землетрясенє в Бельгии. В субботу, дня 10. т. м. дало ся отчути сильне землетрясенє над западном Европом, особенно над Бельгием, полнотном Франциом и Англиом. Землетрясенє было барз коротке, бо тревало всього 1 минуту, в которой земля затрясла ся 4 разы, але было так сильне, же в многих місцевостях завалили ся дома. С под розвалин хат выдобыто парудесят жертв.

Шкоды, выряджены землетрясенєм сут великы.

Маса домов розвалило ся, ище больше потріскало, або повывадали с них шибы. По перевертали ся также фабрычны комины, а в фабрыках пересунули ся машины. Серед населеня повстала паника.

Землетрясенє повторило ся ище слідуячого дня, але было значно слабше.

Швеция залаяна водом. В полнотной Швеции, от долгих и сильных дождей, выляли рікы и залаяли около 2000 гектаров землі. При получении рік Виндель и Уме вода розлаля ся на ширині 7-ох кильометров. В том районі находят ся величезны магазыны дерева и масы дерева, порваны через воду, сперли ся при желізнодорожном мості коло міста Веннес, творячи греблю, ширины пару кильометров.

Наводненє того, найбільше, яке знає Швеция, спричинило шкоду, идучу в десятки миллионное шведских корон.

Німеччина скупне пшеницу. Ведля меженародной статыстыкы рольничой Німеччина закупила в квітні т. р. 142 тысячі метрычных тон пшеницы. (Прошлого року в том часі 48 тысяч тон).

За 8 місяцов до 31. марта т. р. Німеччина закупила 27. миллионів тон пшеницы, а за тот сам час в прошлом році лем 2 миллионы тон.

Вітерница знищила школу. Над Америком в стейті Тексас перешла вітерница о нечува-

ной силі. Особенно сильный вітер перешол над містом Клиде, где розбурило цілковито 20 домов, а меже нима школу в часі, коли отбывала ся наука. Сут ранены и убиты.

Вітер был так сильный, же тягаровы автомобили перевертал, як легкы перка. Также без труда вырывал дерева с корнями. Вітер знищил цілковито дроты и столбы и спричинил перерване телефоничной комуникации.

Стражацке авто забило бабу. До пожару, який вспыхнул в хаті Сусідка в Поворознику, іхало стражацке авто с Мушины. В Поворознику из за угла хаты вышла несподівано баба и авто ударило ю вахляром так несчастливо, же баба упала мертва на землю.

В Києві розстріляно 217 совітских урядников. Газеты доносят, же под конец мая розстріляно в самом Києві 217 совітских урядников и же число того не вычерпне ище жертв. По них має быти розстріляна слідуяча партия сов. урядников.

Пасторы не хотят поддати ся Гитлерови. С Берлина доносят, же 40 процент німецких пасторов евангелицкой церкви не зложило присягы на вірность Гитлерови.

Ціны суровых товаров упали. В маю значила ся сильна знижка цін товаров суровых, особенно гдеяких металей. Упала ціна міді, цыны, цынку, олова, а также какао и пшеицы. Знижку цін металей объясняют собі тым, же державы вздержали закупы тых товаров для военных цілей.

Што до пшеицы, сподіваны сут незвычайно богаты урожаи пшеицы в Америкі, а также добры урожаи в России и Румунии. В инших европейских краях урожаи сут вдовольаючи.

Продал жену за 500 злотых. Перед судом варшавским отбыл ся незвычайный процес. На лаві оскаржених засіл Антоний Козак, агент, который продал жену за 500 зл.

Козак оженил ся перед 7-ома роками. По якмси часі Козак роспил ся и закрала ся до них нужда. Жена познала в том часі Євгена Зарембского и тот звернул ся до Козака, штобы он отступил ему свои права до жены. Пришло до згоды и Козак продал Зарембскому жену за 500 зл., с чого половину выплатил ему зараз а другу половину мал му дати за 1/2 року.

Козак выбрал по пару злотых и Зарембский заявил наконец, же выплатил ему уж всьо. На той почві пришло до авантуры. Раз Козак вдер ся до хаты Зарембского и грозячи Зарембскому и жені револьвером, выгнал

их с хаты, а пак порубал ціле уряджене хаты. Конец знищеню положила аж полиция. Тепер отвічат Козак за напад, а свідчит против нему „продана жена“.

Смерть бідного фиякра. В Варшаві выдано приказ, же всі конны фиякры мусят мати чисельники (машины, котры сами записуют килько кильометров дороги переіхано) так, як и автомобили. Такой чисельник коштуе 400 злотых.

Оден 62-літний фиякер Нодер, который уж 40 літ фиякровал, так перенял ся тым, же не має за што купити чисельника и же мусит перестати фиякровать, же в день, коли уж не вольно было выїзджати фиякрам на місто без чисельника (1 червня т. р.) вышол рано до стайні, погласкал коня и почал страшно плакати. По пару минутах захвїял ся и упал мертвый на дылины.

Новый Санч приготавлият ся до „Горского С'зда“. Шторочным звычайем Союз Горских Земель уряджат каждого року горскы с'їзды. В том році отбуде ся „Горский С'їзд“ в Новом Санчі в днях 13, 14, 15 и 16. серпня. Новый Санч уж тепер приготавлият ся до того с'їзду. В першой мірі переводит ся раптовно ремонт замку давных королей польских, где має наступити торжественне открыте Музея в часі С'їзда Горского.

На тот час мають выкончити также алею Президента Мосцицкого и прилігаючи до ней площу Домбровского, а также поправити всі улицы в середмістю.

Заряд міста выдал также місцевому населеню заряджене приготувити поміщення и ночлеги для приїзжих гостей, котрых сподівают ся в том часі около 20 тысяч.

Новы процессы в Совітах. Ище в червні т. р. має станути перед совітским судом ряд совітских дыпломатов под закъдом зрады и троцкизму.

Серед оскаржених має ся находити: б. посол совітскый в Берлині Юренев, б. посланник войсковый в Лондоні плк. Василев, б. посл. войсковый в Парыжі Смирнов, б. посл. войск. в Берлині Яковлев и б. начальник войск. департамента в министерстві для справ заграничных плк. Гетляр.

Мусят ся всі купати. Штобы зменшити число выбухающих епидемий и заразливых хворот, высунено проект закона о примусовых купелях. Ведля того проекту гмины мусят будовати купелі для народа и всі люде под рыгором кар мусят купати ся в означених терминах. Присмотр буде мати лікар.

Комунальна Каса Ощадности Повіта Краковского в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.
тел. 115-97, 131-73, 101-03.

Отділення: К Р Ы Н И Ц А, тел. 112.
В Е Л И Ч К А, тел. 6.

Всі порученя входячи в область банковости.

ПОРУЧЕНЯ ДЕВИЗОВЫ
ПОРУЧЕНЯ БИРЖОВЫ
СХОВOK АВТОМАТ.

СУМА ВКЛАДОВ ПОНАД 35.000.000 ЗЛ.
МАЄТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.